



APA N.V. ta disponibel pa keda ofrece hobennan di Formacion Social oportunidad pa core stage

E 6 stagierenan den Aruba Ports Authority N.V. di e prome grupo di Formacion Social ta traha den seguridad riba tereno di waf. Nan trabou ta varia y ta

wordo hinca den tur departamento y ta core warda mescos cu e demas trahadornan.

Sr. Angela, Hefe di Departamento di Seguridad di APA a

bisa cu nan ta satisfecho con e grupo ta funcionando.

“Nan a wordo completamente integra den nos operacion diario. Pero, prome cu esaki nan a haya un training den tanto praktikj como teoria riba aspectonan di seguridad. Banda di esaki nan a haya ‘on the job training’ y awor nan ta full den e parti di operacion”.

Sr. Angela a comenta cu nan di APA ta haya e proyecto Formacion Social uno tremendo y segun cu e trayecto ta bayendo, APA ta keda disponibel pa tuma e hobennan aki como stagiere den servicio.

Un stage na APA ta brinda bon oportunidad pa drenta mercado laboral despues.

“E disciplina cu e hobennan a haya den nan training na Mariniers Kazerne ta keda refleha den nan trabou”, asina Angela a bisa. “Esaki ta bon, pasobra e regimen di seguridad den APA tambe ta hopi estricto. Si ta necesario mi mes ta hala nan paden y muestra nan riba loke no ta bon. Periodicamente nos ta papia cu nan pa tene nan riba e bon caminda”.

Sr. Angela a bisa cu nan ta hayando yamada di companianan priva cu kier ofrece e hobennan aki un trabou ora nan periodo di stage termina. Esaki ta un bon señal.

E hoben Arion Maduro, kende ta un di e 6 stagierenan a conta cu e trabou ta bon, varia y cu hopi responsabilidad.

“Semper bo mester ta atento pa cualkier cos cu por pasa”. Arion Maduro a bisa cu e kier bay scol bek despues cu e caba cu e trayecto completo, p’asina e tin un diploma y combina cu loke el a siña den e trayecto Formacion Social e tin un mihor futuro. Un bon punto di salida.